



Diethelmus ex nobili familia Plaurerorum natus, & à parentibus honestè educatus fuit. Is cum prima rudimenta percepisset, ad nobile monasterium S. Gallense missus fuit, ut & melioribus literis institueret, & bonis moribus imbueretur. In eo loco Diethelmus uivis atq; mutis præceptoribus operam dedit, & mediocrem eruditionem nactus fuit. Cum etiam id genus uitæ placeret, eum ordinem professus est. Eo ibi existente, ob religionis reformationē magni motus excitati in Heluetia. Verùm cum pax undiq; restitueretur, ipse ob uirtutes anno 1533 eius loci 57 post S. Othmarum Abbas eligitur. Tum uerò insignem ibi Bibliothecam construxit, atq; ueteris Bibliothecæ electiores libros in ea ordine disposuit. Monasterium etiam ruinis deforme restaurauit, atq; ædificijs decorauit. Fuit Diethelmus proceræ staturæ homo, pacis cupidissimus, & pauperum egregius patronus. Cum aliquādo monetarius quidam ipsum accessisset, & ei suam operam obtulisset, ipse respondisse fertur: Hoc tempore, cum passim moneta deterior fiat, adeoq; adulteretur, nequaquam tua opera uti possum, nisi & ipse aliquid me indignum committere uelim: ideoq; ipsum à se cum admonitione officij dimisit. Sub eius administratione monasterium S. Ioannis Sangallensi, pontificia autoritate, incorporatum fuit, potissimùm id procurante Florino Flerch Vuestphalo uiro doctissimo. Is cū ibi 1565 in Martio essem, passim per monasterium circumduxit, atq; omnia antiqua monumenta summa diligentia ubiq; ostendit. Cum autem Diethelmus per 31 annum ibi præfuisset, tandē etate confectus, 18 Decemb. anno 1564 multorum luctu obiit, atq; Othmarum Contzen uirum egregium successorem accepit. Casp. Brusck, in Monast. Germania.